

ՀԱՅԱՍՏԱՆԻ ԱՌԻԴԻՏՈՐՆԵՐԻ ԵՎ ՓՈՐՁԱԳԵՏ ՀԱՇՎԱՊԱՀՆԵՐԻ ՊԱԼԱՏ
ՈՐԱԿԱՎՈՐՄԱՆ ՀԱՄԱԿԱՐԳ

ԴԱՍԸՆԹԱՑ 2.4

ՖԻՆԱՆՍԱԿԱՆ ՀԱՇՎԵՏՎՈՒԹՅՈՒՆՆԵՐԻ ՊԱՏՐԱՍՏՈՒՄ

/քննության հարցեր/

Հուլիս 2021

Խնդիր 1. Համախմբված ֆինանսական հաշվետվություններ

«Մայր» կազմակերպությունը 2021թ.-ի հունվարի 1-ին ձեռք է բերել «Դուստր» ընկերության բաժնետոմսերի 30%-ը՝ վճարելով իրական արժեքը՝ 30 մլն դրամ: Մակայն 30%-ի ձեռքբերումը «Մայր»-ին չի տվել նշանակալի ազդեցություն կամ վերահսկողություն «Դուստր» ընկերության նկատմամբ: Այնուհետև, 2021թ.-ի մայիսի 1-ին «Մայր»-ը ձեռք է բերել «Դուստր»-ի բաժնետոմսերի ևս 50%-ը՝ վճարելով 42 մլն դրամ և թողարկելով 6000 հատ «Մայր»-ի բաժնետոմս, որոնցից յուրաքանչյուրի իրական արժեքը կազմում է 4,000 դրամ: Այս ձեռքբերումը «Մայր»-ին տվել է վերահսկողություն «Դուստր»-ի նկատմամբ: 2021թ.-ի հունվարից մայիս ընկած ժամանակահատվածում «Դուստր»-ի բաժնետոմսերի իրական արժեքի փոփոխություն տեղի չի ունեցել:

Ստորև ներկայացված են «Մայր» և «Դուստր» կազմակերպությունների առանձին ֆինանսական հաշվետվությունները 31/12/2021թ.-ի դրությամբ.

Շահույթի կամ վնասի և այլ համապարփակ ֆինանսական արդյունքների մասին հաշվետվություն 31/12/2021թ. ավարտվող տարվա համար

	Մայր	Դուստր
	՝000 դրամ	՝000 դրամ
Հասույթ	684,000	208,200
Վաճառքի ինքնարժեք	(483,800)	(141,300)
Համախառն շահույթ	200,200	66,900
Վարչական և այլ գործառնական ծախսեր	(81,700)	(29,700)
Ֆինանսական ծախսեր	(4,200)	(3,900)
Ֆինանսական եկամուտներ	24,200	-
Այլ ծախսեր	(5,400)	(1,200)
Զուտ շահույթ/վնաս	133,100	32,100

Ֆինանսական վիճակի մասին հաշվետվություն առ 31/12/2021թ.

	Մայր	Դուստր
	'000 դրամ	'000 դրամ
Հիմնական միջոցներ	240,600	124,500
Ներդրում «Դուստր» ընկերությունում	96,000	-
Այլ ֆինանսական ներդրումներ	82,000	-
Ընդամենը ոչ ընթացիկ ակտիվներ	418,600	124,500
Պաշարներ	57,400	28,800
Դեբիտորական պարտքեր	74,000	41,900
Դրամական միջոցներ	2,200	17,500
Ընդամենը ընթացիկ ակտիվներ	133,600	88,200
Ընդամենը ակտիվներ	552,200	212,700
Բաժնետիրական կապիտալ (յուրաքանչյուր բաժնետոմսը 1000 դրամ)	300,000	60,000
Էմիսիոն եկամուտ	28,500	2,400
Կուտակված շահույթ	75,000	28,400
Ընդամենը սեփական կապիտալ	403,500	90,800
Վարկեր և փոխառություններ	119,800	75,300
Կրեդիտորական պարտքեր	28,900	46,600
Ընդամենը պարտավորություններ	148,700	121,900
Ընդամենը կապիտալ և պարտավորություններ	552,200	212,700

Առկա են նաև հետևյալ տվյալները.

- i) «Մայր» կազմակերպությունն իր առանձին հաշվետվություններում «Դուստր» ընկերությունում ներդրումը հաշվառում է սկզբնական արժեքով:
- ii) «Դուստր» ընկերության 1 բաժնետոմսի իրական արժեքը 01/05/2021թ.-ին կազմում է 1,700 դրամ, իսկ 31/12/2021թ.-ին՝ 1,900 դրամ: Համախմբված հաշվետվությունում չվերահսկվող բաժնեմասը հաշվառվում է բաժնեմասի իրական արժեքով:
- iii) 01/05/2021թ.-ին «Դուստր» ընկերության ակտիվների պարտավորությունների հաշվեկշռային արժեքները համարժեք են իրական արժեքներին, բացառությամբ.
 - ա) սարքավորման, որի իրական արժեքը գերազանցում է հաշվեկշռային արժեքը 9 մլն դրամով, և որի մնացորդային օգտակար ծառայությունը 6 տարի է: Մաշվածությունն արտացոլվում է վարչական ծախսերում:
 - բ) պաշարների, որոնց իրական արժեքը գերազանցում է հաշվեկշռային արժեքը 2.4 մլն դրամով: 31/12/2021թ.-ի դրությամբ այս պաշարներն ամբողջովին վաճառված են:
- iv) Տարեվերջին գուղվիլը արժեզրկվել է 10%-ով: Գուղվիլի արժեզրկումը ներկայացվում է վարչական ծախսերում:

- v) «Մայր»-ը 01/07/2021թ.-ին «Դուստր»-ին տրամադրել է 50 մլն դրամ երկարաժամկետ փոխառություն՝ տարեկան 8% տոկոսադրույքով: Հաշվետու ամսաթվի դրությամբ հաշվեգրված տոկոսներն ամբողջությամբ վճարվել են: Տարեվերջին նշված փոխառության գծով «Մայր» կազմակերպությունն իր առանձին հաշվետվություններում ճանաչել է 1.3 մլն դրամ ակնկալվող պարտքային կորուստ:
- vi) Տարվա 2-րդ կիսամյակում «Դուստր»-ը 20 մլն դրամ ինքնարժեքով պաշար վաճառել է «Մայր»-ին 24 մլն դրամով: «Մայր»-ը մինչև հաշվետու ամսաթիվը վաճառել է դրանց միայն 70%-ը, բայց վճարումը կատարել է ամբողջությամբ:
- vii) Տարվա 2-րդ կիսամյակում «Մայր» կազմակերպությունը 28 մլն դրամ ինքնարժեքով պաշար վաճառել է «Դուստր» ընկերությանը 30 մլն դրամով: «Դուստր» ընկերության համար սա համարվում է հիմնական միջոց, որը շահագործման համար մատչելի է դարձել 2022թ.-ին: Հաշվետու ամսաթվին «Դուստր»-ը վճարել է արժեքի միայն կեսը:
- viii) «Դուստր» ընկերությունը 10 մլն դրամ միջանկյալ շահաբաժին հայտարարել և վճարել է 2021թ.-ի մարտին: Իսկ 2021թ.-ի հոկտեմբերի հայտարարվել է ևս 20 մլն դրամ վերջնական շահաբաժին, որի 30%-ը տարեվերջի դրությամբ դեռևս չի վճարվել:
- ix) «Դուստր» ընկերության եկամուտներն ու ծախսերը տարվա ընթացքում առաջացել են հավասարաչափ: Հետաձգված հարկերը, ինչպես նաև ակնկալվող պարտքային կորուստը անտեսվում են՝ բացառությամբ հատուկ նշվածների:

Պահանջվում է կազմել համախմբված շահույթի կամ վնասի և այլ համապարփակ ֆինանսական արդյունքների մասին հաշվետվությունը, ինչպես նաև ֆինանսական վիճակի մասին համախմբված հաշվետվությունը 2021թ.-ի համար:

(25 միավոր)

Խնդիր 2. Անուղղակի մեթոդով դրամական միջոցների հոսքերի մասին հաշվետվություն

Ստորև ներկայացված են «Սահմանապահ» ԲԲԸ-ի 2021թ.-ի ֆինանսական հաշվետվությունները.

Ֆինանսական վիճակի մասին հաշվետվություն առ 31/12/2021թ.

	Հազար դրամ	
	31/12/2021	31/12/2020
Հիմնական միջոցներ	486,200	540,660
ՀՄ ձեռքբերման կանխավճար	84,200	-
Բաժնեմասնակցության մեթոդով հաշվառվող ներդրումներ	18,600	15,220
	589,000	555,880
Պաշարներ	81,850	32,400
Դեբիտորական պարտքեր	21,440	26,200
Դրամական միջոցներ	53,600	16,640
	156,890	75,240
Ընդամենը ակտիվներ	745,890	631,120
Սովորական բաժնետոմսեր	413,000	377,000
Բաժնետոմսերի հավելագին	24,000	18,000
ՀՄ Վերագնահատման պահուստ	47,950	51,680
Կուտակված շահույթ	56,500	39,870
	541,450	486,550
Երկարաժամկետ վարկեր	75,600	45,000
Հետաձգված հարկային պարտավորություններ	28,860	12,470
	104,460	57,470
Ընթացիկ պարտավորություններ շահութահարկի գծով	7,490	8,300
Ընթացիկ ստացված կանխավճարների վաճառքի գծով	0	10,400
Երկարաժամկետ վարկերի կարճաժամկետ մաս	15,200	9,440
Կրեդիտորական պարտքեր	77,290	58,960
	99,980	87,100
Ընդամենը կապիտալ և պարտավորություններ	745,890	631,120

**Շահույթ/վնասի և այլ համապարփակ ֆինանսական արդյունքի մասին հաշվետվություն
31/12/2021թ.-ին ավարտվող ֆինանսական տարվա համար**

	Հազար դրամ
	2021 թ.
Իրացումից հասույթ	489,400
Իրացման ինքնարժեք	(385,230)
Համախառն եկամուտ	104,170
Վարչական և այլ ծախսեր	(22,400)
Տոկոսային ծախսեր	(570)
ՀՄ օտարումից օգուտ	1,620
ՀՄ արժեզրկումից կորուստ	(1,200)
Փոխարժեքային կորուստ	(280)
Բաժնեմասնակցության մեթոդով հաշվառվող ներդրումներից եկամուտ	4,820
	86,160
Շահութահարկ	(22,140)
Տարվա շահույթ	64,020
ՀՄ վերագնահատումից աճ՝ համախառն	55,600
ՀՄ վերագնահատումից աճի շահութահարկ	(11,120)
Ընդամենը այլ համապարփակ եկամուտ	44,480
Ընդամենը համապարփակ եկամուտ	108,500

Հայտնի են նաև հետևյալ տվյալները

- (i) Հիմնական միջոցները օտարվել են 6,650 հազար դրամով: Մինչ հաշվետու ամսաթիվը գնորդների կողմից վճարվել է միայն 70%-ը: Տարվա ընթացքում հիմնական միջոցների ձեռքբերում չի կատարվել:
- (ii) Կրեդիտորական պարտքերի սկզբնական մնացորդը ներառում է շահաբաժինների գծով 2,850 հազար դրամ պարտքը, իսկ վերջնական մնացորդը՝ 16,200 հազար դրամ: Բացի այդ, սկզբնական մնացորդը ներառում է 41,000 հազար դրամ պարտավորություն հիմնական միջոցների ձեռքբերման գծով:
- (iii) Փոխարժեքային փոփոխությունից կորուստը ամբողջությամբ վերագրվում է վարկերին: Հաշվետու տարվա ընթացքում կազմակերպությունը ստացել է 42 մլն դրամի նոր վարկ: Կատարվել են նաև վարկերի մարումներ:
- (iv) Տարվա ընթացքում հաշվեգրված տոկոսներն ամբողջությամբ վճարվել են՝ ներառյալ հիմնական միջոցների ինքնարժեքում կապիտալացված 420 հազար դրամը: Տարվա ընթացքում վճարվել են նաև տարեսկզբի մնացորդներում առկա հաշվեգրված և չվճարված 270 հազար տոկոսները:
- (v) Համաձայն հաշվապահական հաշվառման քաղաքականության տոկոսների և շահաբաժինների վճարումները ներառվում են ֆինանսավորման գործունեության մեջ:

- (vi) Ներդրումների գծով եկամուտը առաջացել է ասոցիացված կազմակերպությունում ներդրումը բաժնեմասնակցության մեթոդով հաշվառելիս: Հաշվետու տարվա ընթացքում կանխիկ վճարմամբ ձեռք են բերվել 1.2 մլն դրամի նոր ներդրումներ: Ներդրումների օտարում չի կատարվել: Ներդրումների գծով շահաբաժիններն ամբողջությամբ ստացվել են և ենթակա են ներկայացման ներդրումային հոսքերում:
- (vii) Հաշվետու տարվա ընթացքում կանոնադրական կապիտալը համալրվել է 18 մլն դրամ իրական արժեքով պաշարներով և 10 մլն դրամ կանխիկ դրամական միջոցներով: Տարվա ընթացքում տեղի է ունեցել նաև կանոնադրական կապիտալի աճ կուտակված շահույթի հաշվին:
- (viii) Հաշվետու ժամանակաշրջանում հիմնական միջոցների վերագնահատման պահուստից որոշ չափով կատարվել է վերադասակարգում կուտակված շահույթին:

Պահանջվում է կազմել «Մահմանապահ» ԲԲԸ-ի 2021թ. -ի դեկտեմբերի 31-ին ավարտվող տարվա դրամական միջոցների հոսքերի մասին հաշվետվությունը անուղղակի մեթոդով:

(25 միավոր)

Խնդիր 3. Պահուստներ, Մեկ բաժնետոմսին բաժին ընկնող շահույթ

Ա) «Պահուստներ, պայմանական պարտավորություններ և պայմանական ակտիվներ» ՀՀՄՍ 37-ը ներկայացնում է վերնագրում նշվածների հաշվառման և բացահայտման նկատմամբ մոտեցումները:

Պահանջվում է ներկայացնել պահուստի և պայմանական պարտավորության սահմանումները և համառոտ ներկայացնել ֆինանսական հաշվետվություններում դրանց ներկայացման տարբերությունները:

(6 միավոր)

Բ) «ՀայՆավթ» ընկերությունը 2021թ. նոյեմբերի 1-ին սկսել է նավթի արդյունահանում: Հանքի շահագործման իրավունքը տրամադրվել է 13 տարի ժամկետով, որի պայմաններից է նաև այն, որ հանքի շահագործման ավարտին անհրաժեշտ է վերականգնել շրջակա միջավայրին պատճառված վնասը: Պահուստը ճանաչվում է հանք ակտիվի հաշվեկշռային արժեքում, որը հաշվառվում է սկզբնական արժեքով:

Ըստ սկզբնական գնահատականի շրջակա միջավայրի վերականգնման համար կպահանջվի 150 մլն դրամ արտահոսք: 2023թ. հոկտեմբերի 31-ին այդ գնահատականը կազմում է 170 մլն դրամ: Ներկա արժեքի հաշվարկման համար կիրառվում է 8% զեղչման դրույքը, որի գործակիցները ներկայացված են ստորև:

8% Չեղչման գործակիցներ													
Տարի	1	2	3	4	5	6	7	8	9	10	11	12	13
Գործակից	0.926	0.857	0.794	0.735	0.681	0.63	0.583	0.54	0.5	0.463	0.429	0.397	0.368

Պահանջվում է որոշել «ՀայՆավթ» ընկերության 2022; 2023 և 2024թթ. հոկտեմբերի 31-ի դրությամբ պահուստի մնացորդները, ինչպես նաև համապատասխան տարիների ֆինանսական արդյունքներում ներկայացման ենթակա գումարներ:

(8 միավոր)

Գ) Համառոտակի նկարագրեք մեկ բաժնետոմսին բաժին ընկնող շահույթ գործակիցը ըստ ՀՀՄՍ 33-ի և դրա կարևորությունը ֆինանսական հաշվետվությունների օգտագործողների համար

(3 միավոր)

Դ) Բաժնետիրական ընկերության կանոնադրական կապիտալը 2021թ.-ի հունվարի 1-ին բաղկացած է 500,000 հատ 1,000 դրամ անվանական արժեքով սովորական բաժնետոմսերից, ինչպես նաև 20,000 հատ 3,000 դրամ անվանական արժեքով և 4% եկամտաբերությամբ արտոնյալ բաժնետոմսերից: Արտոնյալ բաժնետոմսերից յուրաքանչյուրը ենթակա է փոխարկման 3 սովորական բաժնետոմսերով 2025թ.-ի դեկտեմբերի 31-ին:

2021թ.-ի հուլիսի 1-ին կազմակերպությունը թողարկում է ևս 48,000 հատ սովորական բաժնետոմսեր, որոնք անմիջապես կանխիկ դրամական վճարմամբ վաճառվում են արժեթղթերի շուկայում:

Կազմակերպությունը 2020թ.-ին թողարկել էր 10,000 հատ բաժնետոմսերի օպցիոններ, որոնցից յուրաքանչյուրը տիրապետողին իրավունք է տալիս 2023թ.-ի դեկտեմբերի 31-ին ձեռքբերել սովորական բաժնետոմսեր 1,800 դրամով: Բաժնետոմսերի միջին շուկայական արժեքը գնահատվում է 2,500 դրամ:

Կազմակերպության 2021թ.-ի զուտ շահույթը կազմում է 26 մլն դրամ, իսկ զուտ այլ համապարփակ եկամուտը՝ 3 մլն դրամ:

Պահանջվում է հաշվել 2021թ.-ի դեկտեմբերի 31-ին ավարտվող ֆինանսական տարվա մեկ բաժնետոմսին բաժին ընկնող բազային և նուրագված շահույթները:

(8 միավոր)

Ընդամենը 25 միավոր

Խնդիր 4 . Ակտիվների արժեզրկում, հետաձգված հարկեր

Ա) ՀՀՄՍ 36-ը ներկայացնում է այն ընթացակարգերը, որոնք կազմակերպությունները պետք է կիրառեն ակտիվների արժեզրկված լինելը գնահատելու և արժեզրկումից կորուստը ճանաչելու նպատակով:

Պահանջվում է.

1) Նկարագրել ՀՀՄՍ 36-ով սահմանված արժեզրկման 3 հայտանիշ:

4.5 միավոր

ii) Որ ակտիվների համար կազմակերպությունը յուրաքանչյուր ժամանակաշրջանի վերջում պետք է `անկախ արժեզրկման հայտանիշի առկայության, գնահատի արժեզրկված լինելը?:

1.5 միավոր

Բ) Կազմակերպությունը 2020թ.-ի փետրվարի 1-ին ձեռք է բերել հաստոց 284 մլն դրամով, որի օգտակար ծառայության ժամկետը գնահատվել է 10 տարի, մնացորդային արժեքը 32 մլն դրամ և մաշվածությունը հաշվարկվում է ուղիղ գծային մեթոդով:

Հոսքագիծը աշխատանքային վիճակի է բերվել 2020թ.-ի հուլիսի 1-ին, և այդ ընթացքում աշխատանքային վիճակի բերելու համար կատարվել են ևս 24 մլն դրամի ծախսումներ: Պատվերների բացակայության պատճառով հոսքագիծը գործարկվել է 2020թ.-ի սեպտեմբերի 1-ից:

2021թ.-ի դեկտեմբերի 31-ին ակնկալիքների վերանայման արդյունքում մնացորդային արժեքը գնահատվել է 9 մլն դրամ, իսկ մնացորդային օգտակար ծառայությունը ` 7 տարի:

2022թ.-ի դեկտեմբերի 31-ի դրությամբ տեխնոլոգիական կտրուկ առաջընթացի հետևանքով նմանատիպ հաստոցների շուկայական գները էականորեն նվազել են: Այդ պահին հաստոցի իրական արժեքը կազմում է 210 մլն դրամ, սակայն շուկայում այդ գնով վաճառքն իրականացնելու համար անհրաժեշտ կլինեն 3.8 մլն. դրամի ծախսումներ: Ղեկավարությունը նախատեսում է օգտագործել հաստոցը ևս 4 տարի և վաճառել այն որպես ջարդոն 2.4 մլն. դրամով: Շահագործումից սպասվող զուտ դրամական հոսքերն են.

- 2023թ.-ին 75 մլն դրամ;
- 2024թ.-ին 70 մլն դրամ;
- 2025թ.-ին 70 մլն դրամ;
- 2026թ.-ին 60 մլն դրամ:

Օգտագործման արժեքի գնահատման նպատակով դրամական հոսքերի զեղչումը կատարվում է 12% տոկոսադրույքով:

12% զեղչման գործակիցներն են.

- 1 տարի` 0.893
- 2 տարի` 0.797
- 3 տարի` 0.712
- 4 տարի` 0.636

Պահանջվում է. որոշել հոսքագծի հաշվեկշռային արժեքը 2022թ.-ի դեկտեմբերի 31-ի դրությամբ:

9 միավոր

Գ) Կազմակերպության ֆինանսական վիճակի մասին հաշվետվությունում 01/01/2021թ.-ին առկա է 6,850,000 դրամ հետաձգված հարկային ակտիվ: 2021թ.-ի ընթացքում տեղի են հետաձգված հարկերին վերաբերող հետևյալ գործառնությունները.

- Տարվա ընթացքում իրականացվել է սարքավորումների ընթացիկ վերանորոգում 2.2 մլն դրամ արժեքով: Մակայն այս վերանորոգումը շահութահարկի առումով ենթակա է ճանաչման որպես ակտիվի արժեքի աճ, և դրա 1/5-ը շահութահարկի առումով ամորտիզացվել է մինչև 31/12/2021թ:
- Տարեվերջին կատարվել է արտադրական շենքի վերագնահատում, որի արդյունքում առաջացել է 50 մլն դրամի արժեքի աճ: Արժեքի աճի 10 մլն դրամը ճանաչվել է որպես շահույթ՝ հակադարձելով նախկինում ճանաչված արժեզրկումը, իսկ 40 մլն դրամը որպես այլ համապարփակ եկամուտ: Շահութահարկի հաշվարկման առումով վերագնահատումներն ու արժեզրկումները չեն ազդում հիմնական միջոցների հարկային բազայի վրա:
- 01/01/2021թ.-ին կազմակերպությունը տրամադրել 10 մլն դրամ փոխառություն 7 տարի ժամկետով և 10% հաշվարկային տոկոսադրույքով: Փոխառության տոկոսները ենթակա են վճարման յուրաքանչյուր տարվա վերջում, իսկ մայր գումարը՝ վերջում ամբողջությամբ: Փոխառության տրամադրման գծով կատարվել են 400,000 դրամի ուղղակի ծախսումների, որի ազդեցության պատճառով արդյունավետ տարեկան տոկոսադրույքը կազմում է 9.2%: 31/12/2021թ.-ին փոխառության գծով գնահատվել է 106,800 դրամ ակնկալվող պարտքային կորուստ: Շահութահարկի հաշվարկման նպատակով փոխառության գործարքի գծով ծախսումները նվազեցվում են ընթացիկ տարում, տոկոսային եկամուտը ձևավորվում է հաշվարկային դրույքով, իսկ ակնկալվող պարտքային կորուստը չի համարվում ծախս:
- Հաշվետու ժամանակաշրջանի սկզբի դրությամբ առկա է 28 մլն դրամ արձակուրդային հատուցումների գծով պահուստ, որի մնացորդը տարեվերջին կազմում է 31.5 մլն դրամ: Շահութահարկի հաշվարկման առումով արձակուրդային վճարները նվազեցվում են դրամարկղային մեթոդով:

Ենթադրվում է նաև, որ բավարարված են հետաձգված հարկերի ճանաչման և հաշվանցման բոլոր պայմանները: Շահութահարկի համար կիրառվում է 20% դրույքաչափը:

Պահանջվում է որոշել կազմակերպության հետաձգված հարկի մնացորդը 31/12/2021թ.-ի դրությամբ, ինչպես նաև 2021թ.-ի հետաձգված հարկի գծով ծախսերը (փոխհատուցումները):

10 միավոր
Ընդամենը 25 միավոր